

黟縣三志卷七

人物志

尙義傳

胡尙燿字如川一字崑泉西川人候選道嘉慶十一年捐萬五千金倡造碧陽書院既竣邑人循紫陽書院例請准設位以配衛道又捐建東嶽廟及潭口癸酉橋襄成考棚繕學宮培祀會修治歛休祁黟道路捐助府紫陽書院膏火惠濟義倉施湯藥置義渡捨棺埋齒助餉賑饑垂五十年善舉不可殫述嘗於村北隅造亭閣以培水口重刊先儒胡炳文純正蒙求見藝文志子積墳積堂

黟縣三志

卷七

人物 尙義

一

胡積堂字汝華一字琴生候補員外郎嫻音律通勾股法兼精星學富藏古今書畫衡鑒不差交遊皆知名之士生平崇義好善兄積墳早卒兄子二人俱患心疾積堂爲治家政筦質庫數十年坦白無私同族有傳十餘世而式微者爲娶妻延祧貧寡無依者歲伙助之施藥捨棺除道成梁莫不畢力捐貲獨建闔邑節孝總坊重建本村凝瑞菴刻有筆嘯軒書畫錄腐譚集著有致知一得錄子文銓見選舉志湘鄉曾公駐皖修古樂遣知縣李載珪來黟採西川石製磬管文銓與載珪論樂出致知一得錄屬請序於曾公載珪旋郵序來見藝文志

胡元熙見選舉志及宦業傳祖父積德好善熟在人口并載通志及府縣志元熙幼善讀書爲歙曹文敏公所器妻以女孫大傅大學士文正公長女也雖娶於高國而雅尙儒素篤義有祖父風與兄尙燾嗣先人志倡建碧陽書院後又移常平舊倉以其址創試院及彰善祠並葺府縣學宮在家修葺宗譜爲大宗立祠承祧從祖祠有倒塌者修理之貞女歸胡族者贍之歿則理其墳塋辛卯壬辰甲午歲歉三次倡捐平糶施醫藥棺木修道路橋梁在京師添設會館房屋出守浙江捐廉寄歸恤族之鰥寡孤獨癯疾者名曰先斯會解組後見書院舊章廢弛重理之復其舊

黟縣三志

卷七

人物 尙義

二

客民入邑采煤燒灰至於掘冢大爲民害白官驅逐之瘞被掘遺骸於庵堂基爲叢冢并立惻隱會爲掃冢費又出資爲大洪嶺掃雪通道之費府城河西橋圯重建費十萬金閩八寒暑而始成咸豐癸丑粵寇陷皖奉

旨輸

財辦理團防屢有功卒家積階通議大夫大學士彭公爲傳見藝文嘗贖故人孤子爲僧者讀書授室邑父老能言之然在元熙生平義舉甚多此猶小善也屏山朱鍾續湖海詩傳纔數卷而卒元熙輯成之

胡文鐸字政宣西川人候選中書父積城見前志選舉本志文苑年老謝事遇善舉令文鐸爲之文鐸遵父命好義

樂施嘗捐鉅貲修歛休邗黟大路僑居休甯見梅林葉邗兩岸水決道圯尋舊途經表延十餘里鳩工改造往來德之道光八年捐資重造本邑八都永濟橋纍石架木規模宏做設路燈置木欄橋不朽者歲一易他如襄修漁亭永濟橋重建六都夾翦亭捨棺置渡散藥施茶厯二十餘年不倦

胡榮命字希禹西川人仁厚長者賈於江西吳城親屬依以資生貧者歲往貸無靳色賈五十餘年臨財不苟取遇善舉輒捐貲爲之名重吳城晚罷歸人以重價賃其肆名榮命不可謂彼果誠實何藉吾名欲藉吾名彼先不誠終

黟縣三志

卷七

人物 尙義

三

必累吾名也有識者避之在鄉置義冢助葬貲施藥膏必手自製乞藥者多則益喜謂有效驗也其誠心利濟類如此

胡文淦字汲清西川人縣學生與諸弟捐貲埋遠近朽棺數以千計族子弟無力讀書者助以修金俾得從師舉行十餘年不怠

胡福彩字炳章西川人監生捐職營千總好善樂施捐貲倡修邗門南鄉山路自坪里距城五十里向之崎嶇者盡成坦途又同弟祿彩出貲督造本縣嚴嶺不辭勞費每於歲暮輸錢多緡恤族貧者遇不平事據理折之排解各愜

其意無不悅服歿數十年人猶思之

胡祿彩字炳文福彩仲弟好義與兄同志拯災卹貧尤剛直好善惡不善不避嫌怨道光甲辰與福彩共造巖嶺乙巳告成督工弗避寒暑化險爲平咸豐三年獨修浮梁東鄉錦溪石橋道路十餘里費千餘金

胡康彩字次三福彩季弟好義亦與兄同而圓通不忤人道光甲午江西景德鎮災官紳捐賑施粥屬康彩總理五廠臨江會館建昌會館二男廠凡四千餘人地藏菴一廠皆瞽癡篤疾者凡千二百餘人城隍廟水星閣二女廠凡三千餘口五廠皆憑籌給粥籌有長短先以長籌付五十

黟縣三志

卷七

人物 尙義

四

四保各認地段按名給之令持長籌來發粥時易以短籌次日復持短籌來易長籌如此循環無復無遺官來彈壓行無所事合鎮安堵詳請 奏獎議敘八品

胡崇福字希五西川人賈於浙江直耿有士行臨財不苟在遂安縣數十年以氣義爲遂人所重宰不平解紛爭罔不心服同鄉人客游於浙者崇福館之授餐贈費歿者殯之捐置義冢倡修連嶺廣施棺木善行甚多年老還黟齒於西川胡族最長儀型其鄉賑貧修路樂善好施年八十餘乃終以子宗然 贈階

胡應鐘字聲永西川人尙古好義賑恤親鄰提攜子弟捐

貲獨修桃源古路助建考棚增捐碧陽書院膏火兩次修
支祖祠門創立祀會歿後祀崇教祠以子尚淇理問加級
贈階

朱作楹朱村紫陽里人見前志尚義至其孫承珪等所共
爲義舉如捐造府城朱文公祠助修河西橋造江西浮梁
南鄉大路築九都泥坑路捐修紫竹庵及施棺材三十年
皆繫作楹之名道光中捐輸海疆經費蒙 旌急公好義
額與父啟仁俱祀崇教彰善二祠

朱光宅字英亭作楹之長子捐職州同邑修學宮建書院
考棚光宅皆捐貲又助膏火鄉會試盤費辛卯歲歉出穀

黟縣三志

卷七

人物 尚義

五

賑貧平糶卹族修本村大路訓導朱駿聲作傳見藝文志
卒祀書院崇教祠子承珪承璨

朱承珪字采文捐職都司道光壬辰癸巳歲歉在江西出
穀賑饑施樁埋齒補捐邑書院費及鄉會試盤費助修紫
竹庵休甯布衣程堂作傳

朱承璨字星田捐職衛守備友愛好義修祖祠賑宗族不
靳巨貲同兄弟捐貲重建赤帝廟別於景德鎮施棺掩埋
修亭造路本邑捐助考棚捐置義冢

朱光裕字翼堂作楹之次子早卒嗣子承璠以光裕名捐
碧陽書院膏火千金祀崇教祠獨造八都社禾嶺同兄弟

捐貲重建赤帝廟

朱輅字嗣昭作楹之三子歲貢生候選訓導好讀書卽臥病不釋卷席豐崇儉見義勇爲邑建書院考棚輅均樂輸他善舉甚多知縣王蔭森贈以一鄉善士額卒祀書院崇教祠所著詩集見藝文志子承璋

朱承璋字毓珍州同道光十五年旱災出境購米減糶振族修東文嶺建屏山朱氏節孝祠捐麻榨義冢修麻榨大路造赤帝廟及黃山靈官殿別傳墓志見藝文及邱墓

朱鏡蓉字晉康一字和甫承珪之子廩生能爲顏米眞草八試六薦危得之以海疆捐輸議叙中書自號小憎作尙

黟縣三志

卷七

人物 尙義

六

志堂築南谿別墅與時賢吟嘯其間若忘世事及咸豐甲寅粵寇犯徽鏡蓉與余兆元葉承宣其募桃源義勇援祁復城兩上張文毅芾書陳兵餉入事以次如議行又使子汝霖芾勇與程錫嘏同追賊於橫潭續助戰於柏溪明大義如此它如修族譜刻屏山詩乘說文通訓定聲重修迎靄門外書院大路助族人婚嫁施貧人棉衣猶其小者別傳見藝文

朱雲書字厚康一字小漁承璋之子監生浙江通判提舉銜咸豐丁巳提督江長貴委辦文案收復祁門石埭

賞戴藍翎後隨剿衢州婺源皆有功卒年僅三十三初父

承璋有典鋪在十都漁亭藍田三處臨終遺命雲書兄弟
力行善事道光庚戌修桃源門外石橋咸豐癸丑賑饑甲
寅乙卯漁亭十都兩典先後被寇焚掠生計漸窘猶竭蹶
償質物者以定亂後人心而藍田典亦罷業人尙以富目
之捐輸團費鉅貲尾漙五百催繳火急又期功寄貲罄於
寇盜亦責償於雲書有漢直不疑之風以是益貧少時讀
書黃山藏書畫頗多自爲畫亦臻逸品有詩文集四卷弟
雲龍字允康監生江蘇縣丞留皖差委稽查省城西門勤
慎積勞卒湘鄉會節相奏奉 諭旨照軍營病故例予
卹初汀漳龍道徐榮守黟漁亭雲龍與余兆元實從之剿

黟縣三志

卷七

人物 尙義

七

賊復建德城又與兄雲書遵父遺言行善舉書畫弁佳有
侶雲館詩二卷弟雲驥字普康質重能文兄弟怡怡如也
奉母避地江西間關至皖歸雲龍之喪母氏旋歿雲驥以
毀卒

朱汝驥字冠卿鏡蓉四子嚴重無執袴習喜濟人急不尸
其名咸豐己未石太難民避地黟境驥邀族人設粥局以
賑之兼施藥散全活甚衆惜字印迭陰隲文科名顯報諸
書

朱光謙字士恭紫陽里人監生事親孝接物誠爲人正直
見義勇爲修平道路費巨貲無靳捐助碧陽書院膏火陪

祀崇教祠

朱光闕字懷魏紫陽里人監生豁達勁正條理祀會睦族信友修造桃花源潯陽臺大路資濟貧乏施棺置義冢善舉頗多

朱承訓紫陽里人商於江西吳城鎮爲徽商輻輳之區鄉人覓業而來與失業而貧者承訓因材推薦或贈歸貲死則棺殮歲時釀祀族人之歿無主後者

朱照開字玉堂紫陽里人弱冠喪父愛弟推產讓財商於安慶賑饑施棺置義冢在家睦族排難有顛直之目疾革書好兄弟何忍分離七字而終

黟縣三志

卷七

人物 尙義

八

朱錫晉字佩紳紫陽里人監生賑親族修祖祠及本里長豐社廟

朱榮薦字按賢紫陽里人監生恬靜尙義修橋造路無所恹於皖城救生局大洪嶺諸善舉皆慷慨資助

舒崇榘屏山人道光八年知縣胡元勸捐掩埋崇榘助葬三百棺旌以一鄉善士額

舒崇澎字海東屏山人樂善好施置義冢周貧乏又在景德鎮同人局施棺木掩骼埋骨多有義舉年九十餘

舒立昆字肇修屏山人議叙同知質直好義道光四年浙江歲歉立昆捐貲助賑帥巡撫旌誼散任卹額在籍獨建

支祠用費萬金未科一錢并建黃山文殊院置義冢掩埋枯骨周濟親族和睦鄉鄰聲施至今

舒爾祺字受禧屏山人邑庠生祖遵錡父堯輔並質直好義爾祺承祖遺產儉而能守同治二年支祠寇燬爾祺獨力捐造於舊址仍曰慎徽堂旋病終未有子族衆以其祖父及爾祺木主送祠祔祭

余振鐸字泉芝城西隅人與弟慶元字篤其皆捐職州同心樂善道光十九年獨力捐修城內及藤田街路親督螯石費鉅工固今城內外道平如砥咸稱其功又在漢鎮倡捐造船救生他如置義冢施棺木善舉甚多

黟縣三志

卷七

人物 尚義

九

余景伊字承平城西隅人縣學生咸豐七年賊竄橫潭一帶黟戒嚴城內余程二姓出守方干嶺景伊與余嘉邦余長齡自備資斧團練鄉勇赴嶺會防壘石爲卡賊旋走祁門以功給五品頂戴

余學彬一名國文字質甫石亭人慷慨好施父福欽造大源嶺頭石橋未成而卒學彬成之規溪源至太平路福欽建有樂善鍾慶泗水等亭並於暑時施茶諸善舉學彬歲修踵行遇災患貧乏振恤至再三不倦撰箴言訓子孫語皆布帛菽粟要以讀書爲本務年九十五以壽終子五人嘉珍字偉功附貢生道光辛巳鄉薦未售進京應北闈闈

其弟嘉祥病馳歸親調湯藥者二年弟歿無嗣嘉珍悲傷成疾尋卒次嘉會見文苑

余興洲一名國武字維周福欽第二子監生福欽諸善行興洲與兄學彬弟國憲踵行不怠素篤孝友樂善好施遇災患貧乏振恤再三規溪回祿延燒十餘家與洲親發錢米施棉襖捐貲助造屋宇又置水龍輸眾以備火災病革時命其四子檢親友負券親燬之

余邦桓字希武余村人監生有兄不慧邦桓多讓田產兄子又不慧邦桓復分已產加意撫之客潛山捐置新安義冢居鄉倡修雙溪橋賑老濟貧卹婆養節道光壬辰饑有

黟縣三志

卷七

人物 尚義

十

鬻子者邦桓知其家單傳給錢米使勿鬻賴有此子傳代至今

余永成余村人理問慷慨好義年七十其子欲爲壽永成不許謂余村三面環溪水患沒田廬兩岸宜爲石堤以捍洪流而衛村居敕子建造逾年堤成表二百餘丈費近千金復建玉虹亭於林厯山椒玉虹者知縣曹貞吉所易林厯山名也孫舜臣見宦業傳

余菴字祥遠余村人監生施棺施衣修橋修路人稱貸不責償道光辛卯歲饑捐金購米賑其鄉及卒族鄰哭之失聲

余宗瀉字靜瀾余村人理問孝友倜儻仗義解紛家不中
貲而好施與喜賓客嘗與鄉先生高談經濟然不慕榮利
常稱田家最樂咸豐初邑團練宗瀉集文孝分局儲米二
千石以備不虞粵寇犯境屢集四五六都人士并命子綬
聯團助防事後力辭獎敘城南文昌宮本都文孝廟搭下
溪路本村前後石堤本支祠宇或修或創悉董勸成之
余煥文字維則立川人道光三年造規溪水磨大嶺三百
餘丈自溪底疊石爲基開鑿山坳親督興工并命子成字
鶴亭監理惟期堅固不惜資財四載始竣其費二千七百
餘金險路悉平如砥至洪漲屢發無損行人德之他如施

黟縣三志

卷七

人物 尚義

七

棺木濟困窮善行不勝舉

余燦文字繡章立川人質直尙義排難解紛拯卹困阨道
光七年捐修沿城石路自臨章門外起至迎靄門外石坊
止二十二年修立川井林亭至化字所石路又修榆村至
上鹽鋪石路

余錦文字美友立川人道光二十六年捐輸義冢見政事
志

余昌健字焜吉際村人施膏丸送路燈周緩急助棺殮於
漢上置救生船於本邑修芳川口路助修羊棧嶺

余元祉字信堂際村人捐千金創修羊棧嶺路直至太平

界集費不敷獨力告竣又與胡元熙在漁亭創立登善集
買屋爲浙來客樞停所議有條規無力帶回者卽代買地
安葬又合買牛家坑地捐爲義冢施燈施茶修桃源洞永
濟亭助造河西橋

孫士楷字雅題古築人附貢生祖淇維父思爽並樂善好
施士楷慷慨有祖父風客湘潭嘉慶二十二年司希青亭
事築白骨冢垣費三千餘金道光七年獨造南嶽嶺直上
祝融峯三十里捐貲累萬署衡州知府歸安楊鎮源有詩
孫華字春圃古築人縣學生幼不驕侈長有節概崇儉約
徵文獻宰不平復祀產之蝕而替者室族人之貧而鰥者

黟縣三志 卷七

人物 何義

十一

葬外舅姑殯受業師鬻村北桐樹嶺下石路三百十六丈
擴家塾建祠寢訂支譜散本好義類如此

孫鶴年字鳳羣古築人縣學生溫和孝悌周恤里黨饑必
推食寒必解衣家道中落猶不惜傾囊息爭同族增生孫
垣歿後親舊寥落獨鶴年與垣門人共飲其家生平隱德
甚多倡修石乳亭大路捐貲施茶猶其顯然者

孫廷燾字熙存古築人議敘縣丞少孤節母汪撫之成立
廷燾事母孝同邑汪承露推重之請經理宜興鹺務因與
齊彥槐陳士葵盧沅諸名士交刊善書施醫藥見義必爲
道光己酉宜興荆溪溧陽大水廷燾倡捐賑之卒年六十

四鉛山饒佩勳銘其墓載藝文志子式榮知名於時
程雲翼字儀宇桂林人刑部司獄加國子典籍銜知縣王
蔭森壬辰發倉平糶奉文買補雲翼首輸穀百石知縣劉
東書建龍神廟禮雲翼庀其事有記載藝文置義冢見政
事志歲施棺及殮費卹族孤寡歷久之軍興與兄雲翔
首輸邑局練費又捐貲興族團遞捐徽餉鉅款萬數千金
先是助資督修魁星樓節次捐輸學宮書院考棚海疆經
費急公尙義有六子各受官典一均爲寇所掠雲翼售產
償質物者以定人心此並大端繫於邑事至其孝友睦族
知書史綜錢穀不備書子尙進見選舉尙述見忠節傳

黔縣三志

卷七

人物 尙義

三

程尙壇字言有桂林人理問存心忠厚居家孝友渴於赴
義好施不倦自奉則極儉約而邑有善舉族有衆事尙壇
必出資以助其成卒後子錫禮錫禧孫恩溥等節次以遺
資捐助書院考棚海疆邑局族團各費又捐徽餉鉅款急
公好義能繼尙壇志云

程珍字玉亭橫岡人增貢生授徒多循謹士珍貧而好義
先代祖墓已賞修葺闕因乏息爭競薰其德者忿氣潛消
鄉里推重咸豐五年粵寇焚橫岡族祠燬珍獨力重建不
科一錢以數十年所積修金并賣田成之甕殮不繼恬如
也

程邦曜字榮瞻赤嶺人散篤好義邑南陶嶺通邗東橫路頭蓮花塘往甯池二府必由之路也嶺左右林木叢生樵者亦必由斯路崎嶇險峻人每苦之道光五年邦曜獨力創造石磴三年而功始竣構亭嶺巔施茶水解行人之渴卒後子永植等施茶不衰

程奇峰字軼賢柏林人附貢生議叙國子監典籍銜幼孤孝母讀書不妄交學成孜孜獎誘後進親友緩急解囊仗助後山水患同兄子桂謨各輸千餘金造石壩障之道光己酉歲歉市米賑里人

程桂模字丕文柏林人州同銜伉爽善治生客樅陽大通

黟縣三志

卷七

人物 尙義

古

捐造救生船道光壬辰沿江水災樅陽尤甚桂謨市米八百石以賑并施棺三百餘具安徽佟布政給樂善好施額是年黟亦饑桂謨出米卹鄉里子國輔字克臣附貢生慷慨好義能繼父志

程桂肅字作恭柏林人監生議叙八品以孝友聞侍養父奇峰五十餘年家庭雍睦無間遇人有急隱濟之無德色村南孔道爲水穿齧桂肅架石爲梁并甃石路四十餘丈命子縣學生毓林毓芳親督工役

程鼎禮字超凡瑤山人議叙八品家僅中貲而慷慨好施周給貧交存活孤幼有故人子遭寇擄逃困揚州鼎禮重

金賢其歸嘗於屯浦闢小齋署曰亦陶意慕靖節也

程國華原名清湖字次江桂林人捐職從九品孝親友兄弟中歲喪妻義不再娶經理祀會任勞怨有老屋歲首供祖宗畫像年久傾頽集建一新其後粵寇竄擾抱畫像避地與共存亡竟保全人謂誠感咸豐初邑有雙錢會匪知縣田荆以名刺屬國華長子桂錡治其事桂錡念親老將辭國華助以大義使應召會匪旋亦解散五年四月攜幼子桂鐸避寇於九都之楊梅林五賊破扉入避難他婦女哭聲譁然國華仗義出禦以計遣桂鐸去奔舒村請練勇捕獲二賊餘賊乃遁諸避難者得以無恙人皆義之國華

黟縣三志

卷七

人物 尚義

五

早歲從其族父毓蘭族兄式金讀書後以家貧服賈養親自歎得師而學業弗成乃督教其子甚嚴親見桂錡武舉桂鍾附貢而卒後數年桂鐸亦補增生桂錡見選舉志

程熙聰字達俊柏林人監生喜施與善排解勇於爲義揚人善隱人過人多愧勵修行咸豐庚申冬難民避寇鄉鄰者數百人熙聰與江隆賑之設廠新庵人曰粥二甌與病者藥給亡者棺辛酉二月止全活甚衆子歲貢士盈有書施粥事載藝文

江隆字德輝五都汪村人捐職待詔樂善好義置義冢重建馬金嶺亭咸豐庚申冬難民避寇鄉鄰者數百人隆詣

程熙聰謀賑卹之設粥廠於新庵人日給粥二甌病者給藥死者給棺埋葬兼給衣履笠炭俾禦雨雪凡五閱月隆割資尤鉅是年秋何朝名胡有立何朝貴葉祥麟等倡捐設粥廠於喜槐亭并施衣履笠炭藥棺葬地凡三次集賞王辛酉夏停止曾大臣獎給義重鄉閭散善不怠兩額懸掛喜槐亭

江光裕字綽堂江村人增生嗜古熟史學制行不苟威儀嚴毅見者肅然敬畏經理文會多年增穀加試資重修江族七派宗譜知縣王蔭森為之序修尊經閣東山寺督工勤出納審人皆服之子維翰維垣皆游庠

江一鵬字偉堂江村人歲貢候選訓導少喪母弱冠喪父撫養弟妹婚嫁備禮分田宅泯偏私人無間言妹寡資養

黟縣三志 卷七 人物 尚義 六

至老乳母貧無依生給錢米死殯葬之造家祠修宗譜列祀主會族人次第舉行族中偶有爭競數語解釋精醫活人甚多邑人程鴻詔為作傳贊載有恒心齋文集中子維城見選舉志

江海字永清蓬廈人附生父際武見補傳海少年與程式金鮑寬進京中途而還然篤於風義拮据刻其業師何瑞龍遺文士林以是多之

江攀桂字丹五蓬廈人縣學生者年嗜學為文簡潔兄弟友愛事寡嫂撫孤姪有恩禮邑中公舉祖鉞祀會皆賴其力子廷誥亦縣學生

江吉字藹堂蓬廬人附貢祖尙濟父永鎔俱見前志永鎔貧吉欲懋遷以養永鎔不可乃讀書勤學業成教授於其鄉硯田以豐又慷慨任事迹近任俠而宅心和平叔父永鏗乏嗣吉視猶父生養死葬之植二弟成立完娶江光裕等修尊經閣東山寺吉與有力書院考棚吉並與議子廷鳳見科第

江玉琦字紹華蓬廬人理問銜少貧三十歲後業漸饒家漸康捐鬻蓬廬村口至龍蟠橋沿溪石路百十餘丈行人便之子國鏞錢塘商籍廩生

江良基字自堂江村人理問銜好施濟卹孤友族祠列主黟縣三志卷七人物尙義
輸金成其事又輸義冢修村內外路二百餘丈捐助碧陽書院膏火及捐修府城河西橋施藥濟饑客游造船利涉有四子徽鎔見選舉志

江名巽字望五蓬廬人監生支祖江鉞祀會廢弛名巽與成海燕等共理數年贖祀田置祭器并將會費重修造蓬廬口高橋

江廷秀字樸存蓬廬人監生勤儉孝敬幼時喜誦廣廈庇寒之句晚年修蓬廬至容干路鬻石六百餘丈咸豐中大興朱甘霖過黟爲作記

江朝龍字化霖蓬廬人縣學生端謹崇古道耿直不諧於

俗非義之財絲毫不取雖饔飧不繼晏如也貧而好義以子寄養貲周卹親友睦族濟因爲鄉閭所重歿而見思贈階見選舉四子夢熊字其光業賈知醫施藥惠人事親誠孝待弟友愛夢勳自有傳

江夢勳字禹功朝龍子捐職從九以廉賈起家用敬養父母生事葬祭盡禮獨力葬祖不惑形家言昇伯兄金千餘又爲仲兄季弟畢婚人稱之則曰此分內事也族母瘖其子依夢勳教養及長爲之娶婦與族人修族譜築東溪橋造北嶂路捐義冢於竹園坦常德水災賑生者金施死者棺歲暮隱惠窮民厯行不倦所造橋至同治七年蛟發而

黟縣三志

卷七

人物 尚義

六

地子附貢生慶成重修之夢勳別有傳贊見藝文志

江良相江村人樂善好施道光中施棺百口知縣胡元獎以繼美堯夫額

江肇龍字錫榮大星人造村前程家嶺大路及村口大木橋襄修方千嶺

江聯燦字星五梧村人監生試北闈不偶遂商於楚業稍裕歸鄉輕財仗義見善必爲修族祠立社廟造霍溪路置梧岡橋子元堦字睦齋有父風立義冢施棺木捐刊福緣必讀科名顯報諸書咸豐五年賊據江西糧梗價昂堦出積穀以濟鄉人又採買平糶石太歛休四邑人避亂來黟

壩集賑安全甚多

江杰字俊瞻江村媵人事父又榮以孝稱族鄰有孤寡者月給錢米貧不能娶者助以婚費客廣信助貲育嬰堂又與徽之留於信者仿漢皋金閭例捐建會館祀朱文公晚擇地重建宗祠未舉而卒子勳魁等承志葺工以子輝贈階

葉文富秀里人仗義樂善輸置義冢見政事志知縣胡元給義舉可風額訓導薛鳳煥書

葉嘉熺秀里人道光八年水壞龍蟠石橋嘉熺倡捐重造北路行人便之

黔縣三志

卷七

人物 尚義

九

葉雨霖秀里人經理永賢祀會增置租畝道光中與增生江光裕附貢江吉經修尊經閣東山寺秉公任勞

葉懋适字字涵南屏人寬厚誠篤客江西以商賈起家好拯濟造中墩石路四百餘丈焚借券二千餘金子瑞訓附生繼父志成豐辛酉環境皆寇糧貴瑞訓盡春積穀平糶餘見封廕

葉紹濤字次山南屏人縣學生體直好義施石灰掩埋露棺施藥材以拯疾獨力捐造龍東塢山路又於嶺上山均造亭樵者得蔽風雨焉明醫理活人有效

葉康齡字熙宇南屏人從九品忠厚樂善施棺木掩露骸

祖紹濤造龍東塢亭山路並康齡監工任勞

葉兆鐘十一都葉村人錫工倡造雞頭蜈蚣二嶺碑勒其名

葉啟字奏成南屏人監生孝友好義粵寇初擾黟集設分局團練啟與有力嗣又設廠賑粥喜槐亭以濟鄰邑難民捐有義冢一處土名南山下

王登瀛字自蓬城東人縣學生事親孝善居喪弟仲客死湘潭遺孤賴登瀛教誨成立代治生產垂二十年登瀛學綜羣籍善綴文試輒優等累薦未售教生徒學先躬行門多佳士尤尙義輕財倡捐集贖祀產以供祭費經畫族事

黟縣三志

卷七

人物 尙義

三

大小就理董建書院以廉潔聞筦節孝祠設位給籌收租發胙從無舛遺合捐義冢事見前志年八十一而終遠近悲悼子以寬見文苑傳以誠貢生

王忠綸字宗五郭隅人兒子早孤撫教成立授室與弟同居共爨弟歿養其妻女服兄弟貧者月給銀以周之在漁鎮貿易協募捐修溇陽臺至石山及祁東之路併建永濟亭施茶數十年年至八十而終見其孫炳入學炳字熙遠能詩不年

王吉慶字贊堂城東人監生孝友睦族慷慨好施道光五年過西武嶺見雪深數尺行者苦之獨出貲倩工徧掃行

人稱便族中孤孀者無資埋葬者戚友緩急相告者皆飲恤之

王鳳來字宇儀東隅人廩生能爲說理之文訓蒙盡心咸豐癸丑甲寅襄辦練局苦心調劑任過辭功教諭周槐卒官五櫬不能歸鳳來捐環碧門外地葬之見邱墓下鳳來母歿甫一月以毀卒

王興致西山人前志記其祖常修三姑溪橋及霍溪路興致繼祖志接踵修理倡其弟兄聚一會施霍溪口亭夏茶至今不絕七世未窆興致獨力營葬頗通史事嘗云人不必皆讀書古今史事不可不知

黔縣三志

卷七

人物 尙義

三

王功茂字榮美八都珠川人監生樂道好施濟急扶危奉母事兄克盡孝悌橋亭道路竭力修葺并建族祠族人德之額曰俯仰無慚

王盛琦字秀堂二都榨裏人例貢生兄弟三人相友愛道光癸卯盛琦輸碧陽書院銀兩奉父世隴主祀宗教祠祖祠火盛琦獨力重建調親族恤鄰里罔不備至

汪士鏡字景揚湯村人從九品好施有義舉道光中水壞蜀川石橋士鏡倡集重修并造上下石路又獨造小七都石路數十丈

汪琴字聲和十一都嶺下人監生周濟族鄰塾費爲人息

訟客廣東有同邑葉甲販茶未售暴卒琴素不識甲殞殮之代售茶歸其資櫛簿籍清白祖祠爲賊焚燬琴偕胞兄瑋率族人集資重建竭力落成立扶歸會施棺以濟難民瑋貢生刻其伯父景霞東麓稿

汪方錫字溥韓宏村人議敘載前志業浙鹺時父老弟幼經營十年積鉅貲與弟分之不有私財嘗施藥施茶湯見羊棧水冲難行集資重修親督其工三載乃竣子正準見宦業傳

汪授甲字龍門附貢生汪家駒字千里州同銜俱宏村人夔倫克盡才能任事每遇善舉協力成之勞瘁不辭嘉慶

黟縣三志

卷七

人物 尚義

三

中造以文家塾二人之力居多

汪庚培字錫文宏村人九品銜承父肇英遺訓跬步必謹母盧手病孿侍奉如其意爲仲弟兩娶季弟客死輿輓歸葬堂叔肇綱歿於浙妻女貧苦庚培賙濟省視餽遺不缺房叔開壽攜家湖州年老乏嗣與妻余先後卒庚培經紀其喪歸葬焉

汪科祥字襲于宏村人慷慨好施見義必爲建支祠倡捐數百金祠成已遂無餘蓄淡泊自甘尤恒人所難也

汪大錄字萬青宏村人幼甚貧以信義見重於人業浙鹺起家每還鄉必爲義舉鄰村火延數十家大錄以米徧賑

之獨修支祠用數百金叠次助修啟善堂捐葉村溪義冢
道光辛卯水災重資賑濟

汪岱字魯巖宏村人有膽略任事敢爲咸豐五年嶺下之
戰備受勤勞鄉人賴其力保全不少

汪珽字寅書四都宏田人增生父葦杭商於浙開化東道
遂安路名大舉葦杭捐貲修理僅半而卒珽繼父志畢工
餘產分給幼弟已以舌耕終老

汪家湍字滄海札坑人貿易望江積二十金回家既渡華
陽江風浪覆後舟家湍大呼救一人酬十金衆舟拯二人
傾囊與之返望江不歸其尙義類如此子國楹監生亦好

黟縣三志

卷七

人物 尙義

三

施族中孤寡無依者月給米以養之

汪庭點字近思七都汪村人監生好施勇義嘉慶初獨捐
重費造潁川橋爲浙閩江西來往要道

歐陽鐸字炳堂七都梅源人仁厚好施事親克謹弟客死
移櫬歸葬以次子嗣之周卹族中貧乏輸錢助葬宜興歲
饑鐸竭貲賑濟道光六年常州程知府贈惠及梓桑額

吳煜字重五四都上光村人貢生捐造上光村橋長子增
生元燮字殿善獨力捐造石場大路自光村口至於黃村
口次子監生國錡字仰周捐輸海疆餉需獨力捐造金雞
源大路自橫迎橋至於五通殿村口並造上下溪塆置半

歆義冢兄弟並能繼煜之志有一門好善之稱

吳有政字景周十都塔川人樂善好施遺資屬子孫繼行善舉有政卒後至同治二年寇久在境避難於山者攜資不繼殆將餓莩有政支裔興岱字冠川以遺資命姪孫宗祐傾囊分濟全活爲多寇退命姪孫宗苑監拾被難白骨三百餘石掩埋冢地各立石碑四時祭之有政身後遺澤及人如此生前可知

吳興裕字瑩蘭十都塔川人幼孤事母孝隨兄經商楚南勤儉立業備極友愛在星沙倡造徽州會館又捐建兼善堂先是商旅喪殯楚地夫役需索百端及是堂立碑示定

黟縣三志

卷七

人物 尚義

三

章貧商乃不受困道光二十年湖南水荒濟饑數月又於黟北葆嶺建石亭

吳光達字振遠塔川人造北鄉葆嶺石亭子世祿字岐詔修橋補路建亭高庵之巔

吳肇字廷獻橫岡人國學生篤厚樂善乾隆中歲歉賑濟鄉鄰不惜貲嘉慶十四年嘗捐豆坦助建碧陽書院地基老病手焚借券千餘金歿後吳兆順送地一穴不受值問之則曰受肇賙濟聊以爲報

吳松保字禮堂橫岡人捐職理問嘗助理露棺道光咸豐年間買上大山義冢兩處見政事志創建本房支祠輸費

一半

吳元吉字履端橫岡人監生捐置新坦義冢橫岡文會樂
翰節孝總坊基地吉實爲倡並見政事志又善醫診視不
計謝理祀會濟親朋年七十餘無疾而終

吳有光字彩儀橫岡人家產僅能供饘粥而仁慈愛物施
棺放生諸事盡力爲之有告貸者亦應焉憫屠牛之慘力
勸人改業年過八旬盡焚借券而卒

吳庭柏字萬齡橫岡人監生質樸好義發箸河口鎮鄉覓
業者必極力爲謀族親之急罔不濟獨開一鋪名曰聚號
以供失業人停居并給旅食弟妻寡給田以全其節年六

黟縣三志

卷七

人物 尚義

三

十九無疾端坐而終孫序鏞貢生

吳如燦字亮輝橫岡人置上大山義冢見政事志又造鄱
陽程婆石橋子茂才茂德咸豐十年在太陽埠捐貲撈景
德鎮流尸三百餘輸米石賑濟難民

吳尙託葉家灣人牧牛彭田塍下拾布囊內洋錢百六十
四大珠七十餘及高麗葎枝坐候失物者來尋問數悉符
遂還之

何學搢三都何村人廩生勇直有古風宗祠幾覆學搢勸
集千餘金監工修葺並創建後寢出納無私族人賴之
何成桂何村人第成榮俱好施周急嘉慶四年村口建造

樂成石礮兄弟勦成之

何永漣字商彝何村人母盲奉養維謹至老弗衰教三子以義方道光辛卯水宗祠溪塆村口石礮並沖損甚鉅漣命子創輸與修歲饑又命子平糶矜全不少

何元鞏字殿超何村人議敘布政司理問幼孤學賈江西事母至孝母卒寒冬寢於棺側朝夕哭遂病噎進食輒吐不能納米粒念已病且死而父母與伯叔氏之柩八九未葬皇皇然覓其事鄂人龔生同邑人范生聞之賻且約之鄂元鞏感其意力疾治葬畢乃如鄂途遇異人教以鍊硫黃法服一斤病良已居鄂十年爲龔范發箸致貲彙萬已

黟縣三志

卷七

人物 尚義

三

報其助葬誼乃謝歸家興復祀產倡修支祠及規溪祖墓蓄植宰木立石於山別求地葬外舅姑室其二孫又嘗修路合藥賑饑年八十七豫知將歿焚券百餘紙漱沐含笑而終時修沙園路未竟工子應禧孫興松等成其志應禧子緝熙見選舉志

何多佩字聲和軸上人鄉飲賓極貧負販養母居積小康兄亡養嫂室姪母壽九十餘乃終多佩嘗與何啟泰祀會合捐義冢衆建軸上金谿石橋勸捐竣工知縣承壽給孝友克敵額子學海見選舉志

何其奘字克祥其翰字玉堂並蜀上人嘉慶中其奘倡捐

集造石山至漁亭新路有碑勒名同時何多佩捐造蜀上金谿石橋費絀其翰輸銀助成之

史世椿字延齡九都金釵人少清貧商皖起家勤儉好義重建家祠與文會造本村路助修溪橋施棺助葬散賑濟荒輸書院考棚建費送父云澤粟主祀崇教祠助建文峰塔在皖於救生局捐錢布於體仁局施棺道光中皖水災劉撫部韻珂時守安慶令世椿督賑籌畫周密全活爲多石埭之大小約嶺獨力重修貴池之徐莊嶺東坑橋集貲創造祁石之大洪嶺爲徽皖要道倡捐經修墊費千金皖東嶽府黟城隍藥王火神山口鎮城隍大觀亭地藏諸廟本邑靈虛觀九蓮山廣安寺淋瀝庵青陽九華山休甯齊雲山或建殿宇助石柱莊嚴神像及捐月錢悉施財不少

新年逾八十連舉二子人謂德報

郭衡字星如監生五都月塘人仁厚樂善以家貲稍裕凡善舉無不樂從三黨沾惠每遇歲歉賑濟鄉鄰不獨修宗祠置祭租捐助月灣橋梁樂輸大山義冢他義事尤多子紹忠見選舉自衡高祖以來五世單傳衡孫曾十餘信積善之報

項廷植字國光榆村人歲貢幼隨父樅陽就學後館霞川李惟仁家爲排解巨獄精相宅墓謂學宮西偏閉塞宜徙

廬舍以疏其氣甲辰勸惟仁兄弟購而遷之門弟子多人尤著者舉人汪浚

許通衡字啟榮四都高村人嘗出千金修祁門路又獨修本村大路別自月塘至五里牌大路一力修治每歲盛夏在西武嶺施茶普濟行人

許爵字殿傳監生屏山人幼貧而孝長商於楚家稍豐躬儉樂施隨力濟人伙助婚葬襄成漢鎮諸義舉贈鬻妻者金完人夫婦

湯永懿字步皋白干人監生議叙八品父嘉盈例貢生先世服農代皆耕讀食貧永懿經商祁門家稍裕父子始貢

黟縣三志

卷七

人物 尚義

三

監植其弟讀書父命析爨與諸弟實產謂永懿能自殖與以先世所佃之田黟俗凡田有租有佃租曰實產其佃曰典首交租而食佃入者也永懿忻然受之又成父志造松山書屋爲族人肄業所撫弟遺孤教養無懈資助族人嫁娶集金權奇贏將爲義莊年荒折閱因就支祖各祀會復舊擴新節冗置產以祀餘爲義學鄰村世嫌自永懿待以誠信盡感孚在祁門時浮梁船戶爭埠頭聚衆到湖將鬪永懿訪其謀主動以利害曉以大義事解僉議所報永懿曰我黟糧食仰給江西不雜沙水受賜多矣由是積弊皆已道光壬辰旱江西邊糴黟祁市斷米永懿詣府陳狀持

文書告糴饒州米乃通又集修祁門至漁亭石路六十里
監造如法人便之祁門建考棚永懿與有力得議敘并爲
善最樂額居鄉爲族里宰不平仁而有術謂平旦時天良
發見正言易入深得名理喜吟咏與祁門姚勳馬豫同邑
胡成浚俞正禧唱和有春草軒詩稿子球見選舉志
黃飛熊字佐周蓬廬人監生祖祠燬於順治乙酉至嘉慶
初飛熊獨力重建費三千餘金敬宗收族矜孤恤寡別造
浮梁東鄉如意亭捐田爲修亭施茶經費

黃善長字體仁四都黃村人布經歷銜 贈階見選舉篤
孝友恤姻親輕財尚義施棺木置義冢助葬費修西武嶺

黟縣三志

卷七

人物 尚義

完

下至黃村橫街大路費近三千金又修祠前水口大路及
百尺墩水衝之路倡捐集修上堂山靈惠廟皆有功於鄉
里在外則江西景德鎮同仁局及祁門造至景德鎮路皆
捐重貲卒後黃族議於古集成書院餘地建文昌閣以培
水口工鉅費多善長子慶輔等繼遺志任其半黃族謂有
功特於宗祠設善長位永祀之

黃殿元字鍛拔際村人捐職 贈階見選舉志年十六父
世典歿家貧事母孝第廷元方二歲撫養成立服伯年七
十餘子婦均亡貧獨無以資生殿元迎養於家及卒喪葬
如禮以長子嗣之中年家稍裕輕財重義代族鄰無力者

完課倡捐立橋會祀會樂善會施棺及掩埋費獨力修補
城北門外至郭門大路倡捐集廣安寺賑濟難民多方調
恤遇不平事竭力救之江西張炳文字乙垣前署歙縣至
黟時贈殿元詩俠氣直追千載上善名何止一鄉知及病
篤遺言宗祠前有屋妨礙應買折輸基入祠并合同奚湧
騎買村口地基輸公其來龍山駐軍掘濠甚深應捐工填
平大路各亭被賊毀者應與羊棧嶺亭一律修造并於嶺
亭施茶其子慶鴻鏡青等悉遵成父志先是軍興以來殿
元命慶鴻襄辦分局供億官軍勸捐練費撫濟難民癸亥
之劫人多避地遠行留守者多殉難尸若棺久未收葬時

黟縣三志

卷七

人物 尙義

三

殿元已卒慶鴻出資分別瘞之亦其志也

李文意字德誠三都人服賈漢陽所入與兄均之好善樂
施歲暮攜多金居客舍見有窮乏者過陰置於路使拾之
歲饑買婢詢知世家卽贈金遣之業醫施藥不受值壽八
十餘沐 恩賜八品銜子壽昌字體仁監生亦治醫尤
善外科并繼父志施藥建萬福亭於西武嶺施茶又置森
川長壠義冢

李高琳字秀書南屏人監生成豐間在大通荷葉洲捐賑
青陽石埭太平三邑難民之避地者同郡邑人則加贈回
籍之資又置新安義冢集造救生船於羊山磯助修石埭

太平通徽郡大路年八十餘卒子宗熠繼其志

蘇凌雲字興巖赤嶺人縣學生理問銜好義有幹才族事身肩之經理支祖洪公會三十四年續增田租念保祀之難咸豐初錄會祀產集族呈縣立案并將坐落坵段編刊祀產錄凌雲之高祖於西武嶺麓建如心亭歲久亭圯道光丙午凌雲集議重建一亭於嶺上費不貲朝暮監造四十餘日始成癸卯修村口大路數十丈甲辰修中間溪石橋加廣於舊皆義舉也

鮑頤字勳田四都西安人附貢生祖居五都上鮑道光中上鮑族祠圯頤獨出貲移建於西安旁造餘屋爲聚族居

黟縣三志

卷七

人物 尙義

三

計族人公送光前啟後額

邵廷榜字爲霖規溪人遷居石亭元平第五子方正不阿爲一族望大小事咸取決無爭訟者數十年率姪肇基誥鳩工修葺漳嶺以繼元平之志

邵世興字良光元平之子例貢生樂善好施子三州同肇基字繼周監生南三字際周 贈修職郎誥字殿英兄弟雍睦慷慨好善俱能繼世興之志嘗修嶺路並於長培亭施茶咸豐以來粵寇焚掠鄉邑逃亡者衆贖貲歸復人咸德之誥子瑩葆見文苑傳肇基孫恩錫見選舉志

胡純燦字思聖橫岡人縣學生恬靜不妄言有莊僕欲奪

婦志純燦保全其節終身好學能文院長進士王根歎賞之

胡常質胡淦堂並橫岡人並置義冢見政事志

胡玉峴字峙南八都潭口人縣學生守正安貧言動可法待人曲加體恤遇事解紛嘉慶丁丑冬客民來本都源頭挖煤燒灰竭力禁絕

胡尙禮字敬安十都方川人客黃梅道光二十九年大水溺人多尙禮捐雇撈取置八角亭義冢瘞之又於本邑置義冢施藥施茶多善舉

胡文瓊方川人樸質樂善修珠兒嶺路灣裡路村口 關

黟縣三志

卷七

人物 尙義

三

聖廟

胡嘉祺字輝廷湯村人嘉慶十一年捐造本村口石路碑記尙存道光二十年路壞孫監生美翰美魁重修美魁字占一篤友愛懋遷海陽積貲公諸兄弟弟濟人急難命子縣學生桂清焚宿券不責償

胡嘉炎字立颺湯村人疎財重義嘗修麟鳳嶺路數十丈周濟鄉鄰無吝色子監生應衡應鍾好施如其父捐修支祠祭祀賴之

余時喜余英琅胡國亨並陳閩人時喜捐修陳閩村口至西干橋路百餘丈英琅捐造祁門縣長培石路百餘丈國

亨監生道光十一年捐修陳閭橋梁及橋東大路二十餘丈同治七年蛟發此路又圯國亨之孫朝方伐石鳩工重修又監生王士學王晉侯並七甲人助修接武橋及接武驛路橋旁有碑

潘允鏞字景陶四都山口人兄弟六人析產時讓千金息羣競年荒兩次賑族修東嶽山出口至五里牌大路歿前數日取積券盡焚之

丁紹昌字冠臣三都人附貢生祖肇文以文昌在祀典奉事極虔紹昌少孤事母孝剛直耿介不苟取樂善啟行扶危濟困工詩文以家世奉文昌道光庚子重葺惟馨書屋

黟縣三志

卷七

人物 尚義

三

莊嚴神像紹昌妻病危其子禱神而愈語在丁雲萼傳

周嘉椿字茂芳玕田人讀書樂善捐土名高京義冢造村前茂蔭橋倡建支祠承德堂及家塾濂溪墅 贈階見封

蔭

鄭世瀚字化文瑤山人監生少孤客上海徽人落魄於滬者世瀚施助周旋之鄭氏新立宗祠世瀚輸金倡首力贊其成

范名駒字學源江柏山人監生事繼母孝捐貲修橋路家廟置義冢兄子崇勳字立大亦別捐義冢樂善友愛與名駒同

蔣壽昌字頤亭鍾山人監生發著江西主於郭氏郭事中落壽昌力爲籌畫卒恢故業義聲聞於時年八十餘猶能飲飯以壽終於家

時源字達泉十二都霍溪人造釣魚嶺大路十餘里王以寬有詩

方嘉銘字笏書八都桃練人從九弟嘉銘字錫章俱孝友無間嘗捐建支祠列祠主造村口至高村大路架聚星石橋粵寇之擾輸資練局出穀麥濟村人

姚勝隆字有朋城西溪南人州同在浙之常山買桐桑崗地本邑買料兒窟地俱爲義冢

黟縣三志

卷七

人物 尚義

三

姚嘉允字信齡城西人例貢隨兄嘉庭賈於衢道光中捐銀二百助賑衢饑浙江巡撫烏爾恭額 奏獎加鹽知事銜

姚嘉全字瑞武城西溪南人賈於衢之常山嘉慶甲戌乙亥叠賑歲饑道光中衢饑捐銀三百助賑浙江巡撫奏給九品

姚成鳳字德勳溪南人監生修村中大路百餘丈及村前木橋建溪南書屋畀族人肄業施棺散藥置義冢兩處見政事志買僕憫其單傳毀券還之

舒志道屏山人明處士九列賓筵有善行家祠祀會代傳

至今道光壬寅以會款捐輸海疆經費仍上志道名奉
旨旌以急公好義額其祠

城西余種德祠會道光二十五年捐輸海疆經費詳奉
旌獎急公好義額

文苑傳

王清甯字瑞亭城東隅人增生植品砥行作文宗先正歲科優等鄉闈屢薦構環峯書舍專意教授進士余毓祥舉人姚森俞正禧皆出其門著環峯詩稿花生文集

汪興伯字朝二嶺下人見前志選舉學有經術與兄興佐齊名安貧樂道講學於二都東山寺力黜浮華務崇實學有耐軒文集二卷

朱裳字吉中一名承堂紫陽里人敏而好學詩筆工秀狂來名勝必發爲歌咏預修屏山詩乘著冠山園詩稿知縣鄒杰同邑鮑元俚朱集球朱鐘爲之序見藝文志施棺置

黟縣三志

卷七

人物 文苑

三

義冢周貧乏解紛爭

汪錫純字自堂黃陂人縣學生孝友高潔詩文雅秀書法右軍耽書史手不停披數十年不履城市終日吟咏自娛著芷塘詩鈔

江日光蓬廈人見前志選舉肫謹端方能文工書篤志力學閱覽經史十試九薦江浙江日修等推日光爲鶯鳴書屋會長四方從遊者入泮百十餘人余舜臣余光彩最著適胡氏姊寡無依日光依助之數十年卒完其志著有鶯鳴書屋詩文稿子南春字一枝縣學生醅謹能文

江殿元蓬廈人見前志選舉讀書績學文淵雅有根柢并

工詩詞與江日光江源等爲詩文友教學休甯門下多知名士端恪耿介不妄取子南秀字瑞三增生有讀易集說許棻字廣存一字春及屏山人遷城東高祈村縣學生年十二三羣經已卒業博覽子史旁及星卜奇遁壬式熟精騷選韓文杜詩遊浙江肄業宏文書院儀徵阮文達公時撫浙首拔之客兩峰三竺間殆十年詩益工自浙歸親舊貧者賙之歿者葬之督課子孫時與鄰邑胡暉吉饒勳同邑韓玫朱輅朱鐘以詩相唱和所作語燕篇棄樹吟採入江左詩鈔著有學詩小識學詩集證雲深處吟草江干釣舫吟草春及草廬詩文鈔子寶球孫懋修並拔貢懋和歲

黟縣三志

卷七

人物 文苑

三

貢懋賞附生人謂棻家學相傳云寶球自有傳

孫垣字象三古築人增生少隨父兄寓壽州讀書攻苦回黟後肄業金竹庵從程賡唐學爲文字精心孤詣力追先正羣經皆背誦如流字讀宮韻不雜南音南屏葉氏桂林程氏爭相禮延訓授子弟循循善誘因材而篤垣持躬端謹樂道安貧有龍門詩集其詩云曾從江北泛孤舟渡到江南幾度秋任爾狂風喧巨浪堅持桂楫溯洄游可想見其操守矣

孫振葵字養恬古築人廩生爲文皆腹稿振筆疾書不復加點羅尹孚韓玫主講碧陽書院並器重焉平日文成輒

爲人取去故無存稿

朱榮煦字體仁朱村人增生從程賡唐學與同門友孫振
葵孫垣以實學相砥礪稽程課剖析疑義經史多所貫通
能詩文善儷體

朱文立字蒼亭朱村人縣學生耿介恥干求家無宿糧飲
水療饑曠如也工近體詩

胡積城字書門一字竹巖西川人拔貢舉人官戶部具見
前志選舉工詩古文詞歸田後吟咏自娛玩山水富藏弄
與弟積堂同族成浚評古今書畫皆有依據崇儒重道栽
植士林於村前建祠祀胡氏七哲於水口建凌雲閣以培

黟縣三志

卷七

人物 文苑

三

文峯刻段玉裁說文解字正義重刊元儒胡炳文雲峯文
集著瑞硯齋詩賦並行世它善舉載尙義子文鐸傳

汪燮字復齋宏村人見前志尙義封廕晚精易義并工吟
咏著有易說及森玉山房詩草

汪夢桂字秀巖黃陂人歲貢見前志孝友有才畧維持祀
會身任其難好讀書七經皆手抄詩文淵古絕塵并精音
韻之學著有四聲彙音釋義四卷

汪雲翮字蘭雨際村人貢生爲何瑞龍高弟能詩符葆森
寄心盦詩話云蘭雨勤學守身雜詩云譬彼江臯蘭滋蔓
累荆杞願作芙蓉花終不染泥滓憂患何足云敢云讀書

始其品與學可見有玩月樓遺詩徽甯道張鳳翥爲序見藝文志

汪學愔字伯純黃陂人從汪文臺治經學通古義試第一補府學生中甲午舉人所居塘下有亭池竹樹之勝擁書萬卷皆能背誦尤善解經不斤斤以帖括爲學應禮部試卒於京城外二十里之慈雲寺所著經說兵燹無存

汪豐字丙中宏村人縣學生博聞強識作文不苟下筆故屢困於童試年四十餘院試公叔文子之臣大夫僎題胎息公穀錄未半吏撤其卷學使閱草稱歎謂翦繪之花不及生成之花命錄竟首拔之課徒造就甚多

黟縣三志

卷七

人物 文苑

三

汪方鍾字伯英號天美宏村人縣學生髫年作遺懷詩仁孝之言藹如也從胡成浚學次龍井茶歌韻成浚奇賞之尤工駢文俞正燮稱方鍾讀書闕博學有根柢不獨文筆之佳弱冠以詩古見賞於胡學使敬拔冠七學值胡母壽命撰頤園記援筆立就知縣呂子珏敬禮之然方鍾非公不至及呂調去作序送之七試棘闈不遇目幾瞽尙吟哦不輟掌教家塾耳視口授使生徒自筆削公獎外益以己物勸勵之間則縱談子史諳諳不倦造就不少尤愛人才聞有知名嚮學之士造訪傾心爲忘年交家本中人然好施與周貧乏每歲暮與伯叔父宜堅宜堯兄方銘送族中

炭金羊棧嶺亭冬夏施茶之類并不問家計遂致困乏弗悔也所著詩賦古今文及集唐詩并編族人詩文詞集歿後散佚姪正海與族弟子哀刻天美遺集潘山長恭辰爲序見藝文志所修宏村汪氏六房系譜尙存至今賴之汪占晉字虞封官路人廩生少受父廷琛訓邃於經學詞章亦工著有桐軒文鈔

舒道觀字時亨屏山人縣學生篤志好學老年不倦著有學問尋源行世

舒鳳毛字體元屏山人廩生治經學好博覽爲文有所發揮教人讀書求根柢矯浮薄歲科高等鄉試屢薦有屏山

黟縣三志

卷七

人物 文苑

四

館文藁及門多知名之士舉人舒帷最著

程吉莊字午橋郭隅淮渠人附生醅靜尙禮義教人以讀書立品爲訓門多規矩之士若胡浚之忠節程尙陞之友悌程國泰之孝行其尤著者也工書楷法趙孟頫行草近米芾董其昌平生書蹟甚多兵燹後或得寸縑人珍藏之試院天開文運額今尙存

王璋字特泉蔡村人甲辰舉人頽身癯貌目空今古有璞山詩文鈔清腴可誦旁通醫及相地之學爲人伉直敢言邑禁燒挖重興書院皆與其議侃侃無所訕

王日光字旭東城東隅人廩生父樹本有還金事見補尙

義傳日光少孤貧受學於從父清甯能文章受知於朱山長文翰沈學使維鐫道光辛巳癸卯鄉試兩薦不中教授於家門多庠士邑書院勸捐及禁燒灰辦團防皆與籌議有梅溪文稿

許寶球字虞徽高祈人棊子拔貢原與歛許球同姓名爲時藝根柢經術詩古文詞斂才於法工書善製楹帖購書數千卷囊無餘儲泊如也朝考報罷鄉闈屢薦里居授徒從遊日衆多所成就著述未綴緝經亂鈔存邑建書院考棚並與其事子懋修亦拔貢與定遠何廷謙同年廷謙視學江西奏襄校文因爲寶球作傳見藝文志

黟縣三志

卷七

人物 文苑

三

鮑寬字經畬鮑村人元偁之子監生詩有家學著樵唱小草四卷序見藝文志

葉大昌字卜其沙田人見前志選舉品端學粹教人無疾言遽色而人自化工制藝趙鹿泉汪瑟菴諸公雅重之有蕃園文稿

邵瑩葆字朗敷規溪人移居石亭廩貢生國子監典籍改官潛山縣教諭以辦防留黟咸豐三年秋賊陷江西浮梁將薄祁門瑩葆率舟兵駐到湖江西安徽交界地也時烽火相望警報不絕瑩葆與友人書言賊狀使邑人無恐且曰書生橐筆從軍膽氣爲之一豪賊聞有備走饒明年學

使沈祖懋禮瑩葆辦賊慷慨赴召有所陳說乃駐祁門其後賊在太平通章嶺瑩葆家故居規溪近章嶺咫尺因守章嶺爲備未幾卒瑩葆前學於俞正禧善爲文章有詩文集未刊

王以寬字馭和城東人增生父登瀛經理節孝祠語在登瀛傳中以寬兄弟踵司祠務道光時建節孝總坊儒學有借潤意以寬不可因是幾中傷迫於清議乃解歲科試第一無廩缺可補鄉試薦額滿癸卯朱知府蒞徽州詢利病以寬陳三利八弊以練兵爲首咸豐壬子議儲穀備兵荒癸丑赴祁門會議團練章程勸邑捐近萬金開局辦團以

黟縣三志

卷七

人物 文苑

聖

母老先年移家畫公山品塢種雜糧給食藏書最富皆徒山居寇屢犯縣而山中無事人謂以寬知幾未久山居火所著經翼典覽補尙友錄續同姓名錄四六大觀黟山枝乘字學求古錄并所藏書皆燬東臯劄記詩文鈔尙存兩上湘鄉會公書陳時務嘉納派充忠義局委員飭提鹽款奏保訓導旋病卒黟近稱友愛者城中最三家曰程曰姚其一則以寬與弟以誠也

程尙椿字壽庭赤嶺人少有文名詞章駢麗中甲辰舉人黟俗各大族有祠會其支裔大小試獲雋者會以金爲獎謂之喜慶銀尙椿鄉舉時祠會匱乏族人欲賣產以慶堅

辭之軍興辦捐辦團數任勞勩屢防西武方干等嶺積功保薦具選舉志尙椿爲文章下筆千言頃刻而就詞采煥然孳甲新意同時能文敏捷完好者胡朝賀爲最尙椿頽頽之未及著書

汪學樞字星吉又字屯軒麻田人縣學生父旂績學未遇有文名同舍生比之溫八吟訓學樞嚴十餘歲畢四子九經除夕猶使溫經故所讀書最熟先後受知於學使胡開益徐頴朱士彥從山長劉鋈學詩古駢文熟選理通史漢爲文日十許篇有聲庠序從遊甚衆館穀養親父旂得以詩酒娛老七十八十稱慶兩次糶賑將慶九十而父卒致

黟縣三志

卷七

人物 文苑

三

毀疾亟胡元熙以珍劑起之母江隱疾親滌廁踰爲寡姊請旌表嫁兩女弟資裝有加家祠列祐主立祀會悉綜其事邑廣安寺嚮爲 萬壽宮庚子二門殿圯時學樞爲

人解紛爭人德之謝金二百謂拯溺宜受牛學樞不受使修廣安寺別啟募捐鳩工三年始成立水龍會以備災集樂善會以掩骼經修北門沿城大路長生亭橋癸卯胡元熙復興書院屬學樞草定章程考棚學宮泮池節孝總坊桃源門石橋諸善舉並與籌議癸丑團練學樞從公命其子騫偕邵瑩葆赴祁門會休甯楊大容等籌防堵庚申寇踞府城歛休人絡繹來學樞倡賑廣安寺人米一升寇退

乃止黃殿拔江禮門與焉癸亥避地玉山嶽屬避難人多
啟勸商玉山者捐賑之還黜旋卒著左傳類詮卮軒詩文
鈔晚翠齋詩話寇燬無存子騫廩生輯遺詩藏於家

程錫綸字廷揚桂林人孝友傳尙陞長子也歲貢生熟讀
十三經能爲帖括文字樸真自好不以世務攪心惟知嚮
學極有天性辛酉寇難父母避地謠傳遇害錫綸慟哭礪
刀誓殺賊復仇自入都徧走山谷兩晨夜達五都與父母
遇乃大慰癸亥賊至錫綸抱其祖畫像以行賴免於燬年
未五十而卒時論惜之有讀我齋遺文四卷

程國泰一字安甫淮渠人程大增之孫廩生內行純篤語

黟縣三志

卷七

人物 文苑

器

在補孝友傳中國泰爲時藝雅近名家尤長於言理其駢
散文字古近體詩皆有師法著芸香書屋存稿

吳克昌字受穀六都東山人增生冲和恬淡不慕榮利耽
吟咏悉究古詩之源流派別而尤嗜王摩詰韋蘇州著有
梯倉軒詩草

吳大成字奎際橫岡人布衣家貧不耐學買惟嗜吟咏語
多新意當其爲詩得意時爨絕弗顧然廉介自勵義不苟
取訓蒙自給有覆瓿詩鈔

朱培文字質齋紫陽里人增生經史皆手錄爲文敏捷尤
長於詩游海南江西蘇滬浙杭所交多知名士至老手不

釋卷歌詩自娛著桂林山房詩鈔咏古詩集教諭殷紹伊
訓導朱駿聲爲序見藝文志

江際和字鳶天大星人縣學生純孝博學過目不忘兼善
諸子之學著有文論二十卷

江源瑩大星人志大資敏善吟咏著有方塘吟稿

程聖高字德章橫迎橋人家貧好學有聲庠序著有橫溪
詩稿

江鳳藻字麗彬梧村人有聲庠序肆力於詩同時王德徵
王刻山江愚溪江佩舫輩共爲蓮溪詩友有王前之目著
醉雪齋詩稿

黟縣三志

卷七

人物 文苑

畧

江銓字俊衡江村塍人幼孤事母孝受業於程賡唐爲文
雅正弱冠府試第一補縣學生鄉試溺於江拯出自是不
應試專意學詩有居易詩草

汪錫洛字敘卿三都人從其叔父文臺受經學讀書甚勤
苦往往達旦不寐友人謂宜稍養嗇愀然曰錫洛孤貧質
魯百人一千人十猶恐不及其敢媮安竟以病歿終年二
十一所著有經義錄要若干卷唐詩三百首詳註四卷

江錦奐字綺川二都東山人縣學生好學專力經史精究
周易性理言行端方門人多遊庠者子錫銓見忠節

胡翔鳳字篤滋湯村人縣學生家貧苦學博涉經史耽吟

咏其門多知名士

江輝字翰廷蓬廬人附生家貧力學潔靜博古詩文清麗同時蓬廬有江聯甲江丹桂江殿榮皆縣學生並有文行增生江瀾字慶安聰強達事理博雅工詩文受知於學使張鱗

江懋鉞字秉虔江村人縣學生以制藝見賞於知縣王蔭森碧陽書院山長潘恭辰學使李嘉端年三十餘父母相繼病歿以毀卒

江清字近人原名文藻蓬廬人縣學生少學於從祖志伯讀書有解悟五經皆手錄長隨父於浙錢塘洪珏授作文

黟縣三志

卷七

人物 文苑

哭

法工詩卒於安慶有練溪詩稿程鴻詔爲序

何其錫字越凡蜀上人增生直方博雅門多庠士教子嘉埔亦補縣學生其錫未著書而卒

吳錫申字宜之葉家灣人縣學生父廷傑見孝友傳廷傑弟廷棟早卒弟妻程請以錫申嗣而廷傑喪時錫申方六歲哀泣過成人旁觀爲之淚下事程如所生曲得懽心侍疾暮年無懈程亦愛如己出少聰穎工楷書文筆樸茂淵懿年十八受知於知府達秀五試皆第一謂其學養純粹必成大器乃年僅弱冠竟以勤讀嘔血而終士林惜之余嘉會字克修規溪人學彬第二子隨父移居石亭性孝

友少穎悟嗜學能文師事族兄毓祥以附貢生鄉試道光
戊子薦而不售遂家居課子姪潛心研究經史子集耄而
不倦著有遯齋文集

江長文字燦然麻田人秉質聰穎十三歲完九經有會悟
旁涉子史能文詩學李長吉著有思齋詩草年十五以勤
學嘔血而卒

程椿字壽華赤嶺人父光裕豐財好善椿讀書工詞章精
楷法補縣學生歲科優等省試不利易名典以宗人順天
籍入大興學鄉試擬中三十五名經文誤用易觀象

廟諱句寫榜時勘落報罷游西安既而南歸家貲已罄於
黟縣三志
卷七
人物 文苑
兄椿盡鬻餘產復試京師又不偶捐職巡檢歿於湖北椿
與王以寬同學講道論文著有詩文集若干卷椿卒以寬
作傳

汪調元字靜徵宏村人附生屢薦未售設帳課讀不干時
事以正直孝友爲鄉黨推重

汪華燦字秀芳又字嘯園三都碧山人縣學生恬淡冲和
博覽經史著有嘯園集三十二卷

武畧傳

武畧豈易稱哉黟之從軍有績者近歲不乏其人或因現存例不立傳或以道遠事莫能詳故所載僅此

葉承宣字蕃臣南屏人有武畧忠義之氣勃然見於詞色咸豐癸丑團練建議主於殺賊訓勇立砦保里間立條款曰完國課睦鄉鄰除暴亂儲餉精嚴守禦後皆克踐斯言歲甲寅募桃源義勇會余兆元朱鏡蓉等援祁門復建德其後迭次禦賊手斬多名與悍賊格鬥相持不下幾受巨傷其子協力斬之承宣揚揚如平常也解散雙錢會黨勸導本戶納糧集捐鉅款解祁門會營倡捐積穀於家祠平

黟縣三志

卷七

人物 武畧

哭

糶皆其犖犖大節至若復七世祖被占葬地教養兄弟諸子助修村西村東大路及霞五山石礮身任其勞襄成義舉甚多由附生以團防功薦舉訓導未竟其才而終

余光祖字典初監生父舜臣見宦業傳光祖倜儻尙氣節隨父官費縣築堡募勇剿豹子崗盜習武事成豐甲寅乙卯襄辦本邑文孝分局時賊氛已熾光祖於林厯山嶺因險爲關伏壯士於入關要徑林莽中賊至伏發石礮火鎗轟擊斃賊多名獲賊目二名餘黨受創竄去光祖旋以父喪毀卒其後數年賊始闕山陷砦焚寺知曩事者追歎光祖有謀畧焉

汪燦誠字經仁湯村人短身精悍多髯善拳械得少林師
法力敵百人與江世楣友善咸豐中粵寇竄黟知縣王垣
以世楣薦燦誠訓練護衛禦賊有功給六品功牌今撫部
吳公之弟參將修攷佐蕭翰慶率楚師援浙過黟挈燦誠
從征石埭肅清進規青陽吳參將保陞副將給燦誠五品
功牌旋調援湖州吳副將力戰陣殞燦誠死之燦誠與親
軍張元發兩人者俱善泅水當同心橋戰挫之時賊圍數
重兩人欲左右吳副將跳水以免圖再舉殺賊副將不肯
使速行報兄燦誠願與副將共存亡轉鬥殺數十賊而死
元發伏橋下見之始浮水去

黟縣三志

卷七

人物 武畧

罷

舒時澍字義山屏山人善拳勇能空手入白刃復習書法
爲漕督楊殿邦所禮邑紳胡元熙修郡河西石橋請時澍
督工衆帖服咸豐七年夏髮逆掠舒村時澍手斃十數賊
衆賊駭退時有舒必得等與賊戰受傷江鎮長貴給功牌

隱逸傳

余佐字忠元西隅人讀書精易理下簾賣卜有嚴君平之風并工詩畫所居周家園竹木交蔭別闢小園花四時不斷疊石庭砌象黃山三十六峯曾遊者以爲逼肖山長劉整司訓薛鳳煥嘗訪其廬草衣芒屨杯茗論詩而已邑名士孫蒙孫學道汪思道皆與爲友著冬青居士詩二卷

鮑桂孫字古香詩人元偁之孫寬之子散尙風義篤於友朋言若岑鼎不可以贗善篆隸嘗從鄧頑伯游故八分尤入妙著有石鼓文考仿漢紫薇塾漢印譜四箴心箴印譜其人與古爲徒寄酒爲跡家無甌石而真樂不移超然物外或諷之從事顯者掉頭不應以石隱終子旭初

黟縣三志

卷七

人物 隱逸

三

藝術傳

孫廷冕字冠賢一字菽苴晚號山江以童子應試背誦經書補縣學生磊落尙奇偉好書畫古印聚藏甚夥白爲之并工見稱於陽湖孫星衍同邑俞正燮然喜諧謔儕輩酬對輒困酒酣握拳作少林舞人以為狂實則與人交有終始人亦重之書宗山谷畫善山水花卉游黃山作全圖小冊數十盛以縹囊輯所得公私銅印二百餘方自漢時似繆非繆迄元時畏吾兒文繆糾奇怪以石臨之盡其妙於方寸分矩之中至剗漫處亦畢肖可謂奇作道光癸巳卒有石止山房印譜山江詩集雲根栖素之室吟稿縣署清黟縣三志

卷七

人物 藝術

至

慎勤三字廷冕所書

程嘉木字理祥古築人增生博覽經史羣書館歛昌溪從游士如程祖洛江溶等皆知名工詩書畫圖章兼通地理尤精術數著大六壬集行世

俞正鍾字靜初北隅人由附生捐職從九愛尙風雅學趙孟頫書唐寅畫頗得形似家小康好客乃因所居梅溪閣傍溪書舍有亭池花木之勝今亦爲墟然過舊址者猶想正鍾之風流焉有楷書陰隲文石刻一卷

舒可醅字謹堂城南隅人豪曠疎財放意山水通易卜陰陽學充本縣陰陽學訓術工草書晝夜不輟力學四十餘

年指握管處兩紙如小螺甚堅字益勁知縣王蔭森亟賞之謂近今罕此腕力年七十餘作書猶有虎卧龍跳之勢江思誠字一枝蓬廬人工行草筆力清勁學窠大字更奇偉有草書千文刻石

江士煊字旭初蓬廬人縣學生書法鍾王晚精草書蓬廬文昌閣是其手筆同時能書者淮渠程吉莊謂士煊書中鋒懸腕流輩罕能及之兄士煥亦能作趙孟頫書碧陽書院格物堂有草書楹聯

江筆字鳳鳴蓬廬人附生善真行書學趙孟頫隸篆圖章並饒古意

黟縣三志

卷七

人物 藝術

五

汪聯松字樞文黃陂人工篆隸道光二十九年余毓祥等易桃源古洞爲桃花源三字屬聯松八分書有璞齋印譜同里丁紹昌爲序稱黃陂人物如華南石竹硯農墨蘭芷塘楷書小築隸法及梧園行草鶴峯花卉我莊鐵筆丹五銅章各名一藝其兼工書畫篆章者莫如璞齋所仿印章兩卷可登巴鄧之堂也

胡宗姚字毓輝一字松舫西川人附貢生好學博古多藏金石工篆刻得秦漢遺意有松舫居士印譜

朱錫桓字公執九都紫陽里人爲人風雅秉性剛直好讀書不事舉業專攻篆隸圖章盡得古人遺意著有聽松閣

吟草

丁雲萼字珮芳三都人善篆書父紹昌附貢兄雲藻附生咸豐中紹昌妻病雲藻雲萼禱文昌帝君而愈乃刻陰隲文雲藻樵楮銀諸梓雲萼樵篆登諸石以廣神貺程鴻詔爲之序載有恒心齋文集雲萼先卒有印譜一卷

汪思道字履堂黃陂人增生風神閒曠嗜古能詩著有小築詩草書法各體皆工古隸尤臻妙品與欽巴慰祖齊名舒崇湛屏山人工書學聖教序及懷素筆意知府馬步蟾索書堂畫聯額甚多

余有庠字育俊余村人監生廣交文學士嗜古工書章草

彭縣三志

卷七

人物 藝術

三

法十七帖行草法黃魯直臨摹最久子元翰元燾元炘俱縣學生並善書元翰神韻尤勝初名元煥童年應試賈學使稱其筆法似趙孟頫歎賞再四爲易名元翰惜不年

朱培德字竹舫紫陽里人幼喪父家貧學賈工書行草有米芾法詩多佳句著竹舫吟草

吳錫球字蘭舫松嶺人恬靜訥言善事繼母友愛諸弟讀書工詩文書法得顏魯公遺意

王澤溥字春如一字潤生城東隅人廩生受知於胡沈兩學使俱品其楷書爲七學冠自言初不工書得博塔銘學之一月字體一變後乃取閣帖寄暢三希諸石刻徧臨之

又言作字多摹具其體多看得其神皆折肱良語也又善畫蘭賦詩飲酒有超然物外之致

王鑑清字鏡如一字問渠城東隅人附生工書得王一觀王業旦家法能作丈大字景德鎮徽州會館忠孝廉節黜城周王閣額聯均其手書并工詩畫時人謂問渠三絕

葉嘉定秀里人善行書葉姓建秀里亭三字嘉定所書

盧際嘉字會侯縣學生盧村人工行草法米襄陽

湯俊字子堅二都白干人善書畫多藏前人名筆卒後黃尚書鉞見其畫於胡成浚所訪知其為人愛重俊弔以詩云子昇逝後知名少俊也丹青下筆精可惜同時不相見

黟縣三志 卷七

人物 藝術

畫

一生肝胆向人傾

按此詩壹齋集未載蓋集外詩

盧嶧字湘槎盧村人工山水人物畫假山石壁尤佳

查楷十一都雙干人工山水人物法吳道子畫羅漢尤精

胡美翰字西園湯村人監生善畫山水涉筆成趣古松怪

石尤蒼古晚號墨林居士

余珪一名汝珪字友桐城西隅人工畫山水人物花鳥草

蟲俱臻能品圖宿儒俞正燮像畢肖亦工書宗米襄陽趙

吳興

程尙甄字在陶桂林人廣西州吏目有佐治精能之譽瀟

洒喜吟詠尤工丹青畫翎毛花卉鮮明工雅有桃葉春燕

圖乃生平得意之筆絹幅頗長閱月繪畢謁選都中覓良
工裝池顯者見之欲以重價購不可把玩愛嘆而去尙甄
嘗跋俞正燮鴉片煙事述云鴉片爲害使民貧尙可通變
使民弱則所關甚大求得一方去則甚效見癸巳類稿
汪正泉字達原號兩巖宏村人落拓不羈工繪事人物花
鳥鮮明娟秀白描羅漢尤精

汪旌字榮錫號半癡宏村人監生工畫尤善山水

韓繼善字敬之一字子懷奇墅人父潤字愚村工書畫見
前志繼善精地理學畫山水作雙鉤字有父風嘗爲程桂
馥作臨流濯足圖京師鉅公題詠甚多并稱繪事之妙

黟縣三志

卷七

人物

藝術

畫

汪文適字我莊黃陂人畫山水不專一家作秋林晚景有
一峰道人遺意篆刻亦工

汪培字崇安一字硯農黃陂人善畫蘭竹得其族人華南
筆意兄子紹勳字鶴峯亦善畫

汪清桂字馨山黃陂人工書畫嘗擬倪雲林作秋老寒林
圖甚佳與其族人鼇煥文家熾等爲詩畫社不與外人事
孫式燮字企袁古築人從馮照遊畫山水人物均造能品
酒酣揮毫尤妙

朱萼字凝香紫陽里人朱需之子善畫花卉設色水墨並
含生趣有南田草衣遺意詩有家法兼通音律著凝香偶

存詩草

朱本福字履亨九都紫陽里人雅潔嗜古善鼓琴游武林山陰間得異人傳授凡淥水湘妃諸操神與古會一彈再鼓聞之者皆如在松風石泉間歿後餘古琴數張

程尙培字位垣桂林人州同銜善弈游江漢間無與對者晚歸黔訓導朱駿聲與弈服焉家素裕以施與而貧初癯羸藥以阿芙蓉病益甚力罷藥乃愈年七十而歿子光讓見忠節傳

胡新楫字桂爲城北人府學生父維邁增生以醫名新楫承其學祁門中莊方氏兒病衆醫束手請維邁治之適維

黔縣三志

卷七

人物 藝術

美

邁有疾使新楫往見兒書案上水滴硯池皆醋窮詢病因知與羣兒戲賭飲醋酸傷筋治以薑汁辛勝酸遂愈方氏大喜彩輿鼓吹送新楫歸時年甫十五耳名大噪自是行醫數十年年近八十老病好靜避人廣安寺求診者盈門又避居林厯山層崖峭壁求診者繩牽而上乃喟然曰吾仍還家死而後已嘉慶末年壽終子佩丹與周俱以醫世其家

胡朝瑚字言夏西川人幼從塾師學文字假手同舍生師覺監督之朝瑚研慮殫思豁然解悟年十六補縣學生治醫博覽百家而歸宗景岳治病多著奇效同時胡佩丹王

遠音以醫名者咸推服焉

汪荃字香谷宏村人世醫至荃尤精千里延致之嘗治三齡羸女取久白貓矢炙研無灰酒灌之而痊常州名醫法冠卿治水腫不驗使攜方問荃荃謂方佳少活蝦蟆作引耳服之腫全消其神效類如此然猶謹慎日治病夜必檢書辨同異慮謬誤不敢掉以輕心也子濟舟從弟藝書從子松谷傳其業藝書名香自有傳

王顯璈字遠音郭隅人監生父苞附生顯璈孝事之精醫視疾維謹處方多效年至八十活人爲多曹文正贈山中宰相額顯璈謝不敢當知縣徐正琳額以功同良相懸所

黟縣三志

卷七

人物 藝術

七

居今尙存子樹字樹之一名同玉附貢生承父醫學謂神農嘗藥分品上以養命中性下病乃取平和中品百餘以爲常劑它藥未嘗用刻圖書曰能醫假病云孫協泰字仲英從九品瀚字友三附生並世其業

吳百祥字家裕葉家灣人監生通醫尤精小兒科多轉危爲安知名遠近省垣大府不時聘請屢奏效知縣吳甸華贈春回指上額年八十八卒子毓春孫培基郁文俱得家傳知縣承壽贈幼科世業額別詳忠節傳

汪香字藝書宏村人監生醫宗景岳診者盈庭屢奇效安徽張巡撫夫人病眾醫束手聞香名啟請至數劑而愈又

起朱臬使疾贈額曰先聖杏林張贈額曰藝苑摘華
江沅字湘嶼大星人精醫游藝江西治奇證每效廣信同
知周曉廉贈以佛手仙心額

葉嘉猷字夫堂秀里人業醫尤精痘疹子孫世其業
何多祜字振周軸上人祖附貢生士會世精醫多祜善承
家學求醫者踵至不受貧者謝且助藥焉弟多祝字獻堯
亦以醫名

程立勳字際唐桂林人九品習醫靈素越人仲景諸書窮
究貫徹運氣經絡瞭若指掌診治奇證應手而愈年七十
罵賊受傷病亡

黔縣三志

卷七

人物 藝術

五

葉斯卓字東巖南屏人從九品弟斯永字香巖縣學生並
業醫當時黔之醫有四名家曰王遠音吳百祥李體仁葉
次山次山名紹濤見尙義傳斯卓斯永卽紹濤子也

孫立鼇字凌滄郭隅人知醫熟讀靈素於王冰馬蒔諸家
注本手加點校一字不遺長沙金匱傷寒悉能背誦終卷
無誤好學深思心知其意起病處方得古法度視求訣於
湯歌藥賦以名家者相萬矣

程式玉字溫如桂林人以醫名於漢陽弟式莊字敬如以
醫名於江右式玉子鴻烈原名鴻業字承山柏醫有家法治
痘疹尤效兼諳卜易奇門演禽六壬星象并善畫及篆隸

鑄印章造泰西機器式莊見忠節傳

汪大鏞字采宜城西人元榜之繼孫讓產於兄奉生母居六都徐村養寡妹撫孤姪並有恩義醫學仲景求者立應著有醫書兩種子士涵府廩生亦知醫士濟縣學生士治爲商皆受大鏞庭訓大鏞晚善養生辟穀能七旬

朱榮國字治平紫陽里人監生因侍父疾遂通醫理晚歲游於皖上病家延請卽時步往用藥最審處方輒效全活甚衆懷甯知縣鄭泰贈回春妙手額

胡學本字紹基舊庵人治醫家言熟本草精太素脈所診多神效道光辛卯邑多疫求治者踵至學本市藥以濟貧卒年八十餘子天養傳其業

黟縣三志

卷七

人物

藝術

五

汪有德字銳泉鐘樓廈人爲里正管內地丁歲辦縣官優異之家傳醫術治蠱脹應手而愈

汪鏡字友蓉一都人附生能詩畫及星卜六壬尤善相地有傳見藝文志

寓賢傳

朱駿聲字豐芑江蘇元和人任黟縣訓導罷後買田宅寓石村自號石隱山人安徽學政大理馬學士恩溥表其墓曰山人非隱也而以山人名從其志也志若何念典于學孜孜忘老而以是終焉也學以成其志故第以山人名可也山人號允倩故吳門望族生而慧四歲能辨四聲甫十齡諸經皆畢出應童子試旋以郡冠軍補庠生食餼歷游紫陽正誼講室殫心書史凡諸家訓詁衆說異同類能剖源流時有超悟好爲古文詩詞一時名宿鉅公咸器之目爲國士適先後奉諱並嬰疾躓場屋十餘年乃以嘉慶二

黟縣三志

卷七

人物 寓賢

卒

十三年鄉舉第十人義命自安恬如也計偕入都所居游皆名士大夫日上下其議論學益進顧屢試未第獻詩册亦未錄乃南旋然山人書記翩翩牋奏復明切樸茂教人子弟善啟發無倦意門下多高足登上第者所至輒躡屐迎館游無虛日益得酣力於學久之除旌德訓導以終制改黟勤於職暇乃裒集所著書咸豐元年說文通訓定聲訂正成帙時方截取以令用乃親賫達部進呈

覽得

旨褒獎加國子監博士銜遂不謁選歸友生

咸輓之山人笑曰自宦隱桃源久不踏春明路矣今幸黃扉留跡此去行當歸田耳尋升補揚州府教授以粵匪滋

擾道梗未赴年已七十矣因解組顧未得歸里卜築黔之石邨將老焉遂自號石隱山人云越歲卒封贈如其官山人長身玉立資性過人事親務得歡心生養祭葬一衷於禮嘗欲仿范文正公置義莊規條已具未果待人以誠信有急難攸助不吝情詞和易與人無忤惟談經訓說名理則爭辯不少借晦明寒暑輒手一編館榻之旁卷帙羅列公車中誦書與輪軸聲相續老病猶搜討手錄不輟或規之則謂樂此忘疲也蓋山人幼稟庭訓弱冠卽得明師友劇切之益又以曝書揚州文匯閣盡窺東觀秘藏故其學也精而勤嘗夢書屏風一聯云孝弟忠信師乎民是

黔縣三志

卷七

人物 寓賢

空

亦爲政學業文章蘄於古聊以自娛可以得其志之所存矣著書凡九十三種已鈔板行者說文通訓定聲說雅古今韻準儀禮經注一隅小爾雅約注夏小正補傳離騷補注其待梓者易卦解尙書後案便讀詩傳箋補大戴禮校正小學識餘詩賦文詞等集子孔彰讀書治經解字有家學湘鄉爵相辟之軍幕閒出山人自訂年譜屬恩溥爲文以表其阡因盡讀石室諸藏幸窺山人之業且以得山人之志也

